

ACORDO DE COLABORACIÓN ENTRE A CONSELLERÍA DE SANIDADE E O INSTITUTO TECNOLÓXICO PARA O CONTROL DO MEDIO MARIÑO DE GALICIA PARA “ANALISE DE BIOTOXINAS DENTRO DO CONTROL OFICIAL DE MOLUSCOS BIVALVOS”

En Vilaxoán, a 24 de agosto de 2016.

REUNIDOS:

Dunha parte, **Don Jesús Vázquez Almuiña**, conselleiro de Sanidade, actuando de conformidade co establecido no artigo 34 da Lei 1/1983, de 22 de febreiro, reguladora da Xunta e da súa Presidencia, modificada por Lei 11/1988, de 20 de outubro; co Decreto 41/2013, do 21 de febreiro, polo que se establece as estruturas orgánica da Consellería de Sanidade, e co establecido na Lei 1/2016, de 18 de xaneiro, de transparencia e bo goberno de Galicia, así como na Lei 30/1992, de 26 de novembro, de réxime xurídico das administracións públicas e do procedemento administrativo común.

E doutra, **Dona Rosa Mª Quintana Carballo**, Conselleira do Mar e Presidenta do Instituto Tecnolóxico para o Control do Medio Mariño de Galicia (en adiante Intecmar), con sede no Peirao de Vilaxoán, s/n, Vilagarcía de Arousa, Pontevedra, en virtude das facultades atribuídas no artigo 34 da Lei 1/1983, de 22 de febreiro, de normas reguladoras da Xunta e da súa Presidencia (DOG núm. 21 de marzo de 1983) e na Lei 3/2004, do 7 de xuño, de creación do Instituto Tecnolóxico para o Control do Medio Mariño de Galicia.

En representación das súas respectivas Consellerías, e de conformidade coas atribucións conferidas na normativa indicada,

EXPOÑEN:

PRIMEIRO.- Con data 4/2/2016 as consellerías representadas neste acto, xunto coas competentes en materia de Medio Ambiente e Ordenación do Territorio, de Medio Rural e de Economía, Emprego e Industria, asinaron un acordo de colaboración para o establecemento dunha Rede Integrada de Laboratorios de Interese en Saúde Pública da Comunidade Autónoma de Galicia.

O obxecto do citado acordo de colaboración foi o establecemento dunha Rede integrada de laboratorios (REDGALICIA), que permita o uso coordinado dos distintos

laboratorios de que dispoñen os departamentos asinantes, e que xeren datos de interese para a saúde pública.

Dita rede configúrase como o instrumento de intercambio efectivo de información de carácter técnico–científico no que participen diversos laboratorios públicos (entre eles o do INTECMAR), no caso de que a información xerada ou a necesidade da súa intervención sexan de transcendental importancia para as actuacións a realizar en materia de saúde pública, xa sexan a realización de análises, a vixilancia ou o control da saúde da poboación galega, directamente ou a través dos seus factores de risco ou determinantes.

Entre os laboratorios integrantes da Rede atópase o Laboratorio do Instituto Tecnolóxico para o Control do Medio Mariño de Galicia (INTECMAR) dependente da Consellería do Mar.

SEGUNDO.- A cláusula cuarta do acordo asinado o 4/2/2016 determina os fins da rede, entre os que figura *“a provisión de resultados analíticos fiables para a avaliación e vixilancia dos perigos relacionados coa saúde ambiental, a seguridade alimentaria e as enfermidades infecciosas, transmisibles, crónicas e xenéticas”* así como *“o impulso e utilización de técnicas novidosas de detección e identificación de axentes biolóxicos e químicos, e a optimización das existentes, e calquera outra actividade que resulte de interese para as partes integrantes da rede”*.

TERCEIRO.- Tendo en conta o anterior, é de interese para as dúas institucións ter información puntual da situación “sanitaria” das augas de produción de moluscos de Galicia, entendendo por tal o coñecemento dos niveis de biotoxinas; o estatus microbiolóxico e o nivel de contaminantes químicos que acontezan nas zonas de produción.

CUARTO.- As dúas partes recoñecen que o Intecmar, ente de dereito público, adscrito á Consellería do Mar, segundo o artigo 1.4 da Lei 3/2004, de 7 de xuño, de creación do Instituto, conta cos medios e competencia técnica axeitadas para levar a cabo os controis anteditos. O Intecmar (integrado na Rede Integrada de Laboratorios de Interese en Saúde Pública da Comunidade Autónoma de Galicia) é o instrumento da Comunidade Autónoma de Galicia para o exercicio das funcións de control de calidade do medio mariño, de aplicación das disposicións legais en materia de control técnico-sanitario dos produtos do mar, en materia de seguridade alimentaria e de asesoría técnico-científica sobre pesca, marisqueo e acuicultura, no ámbito das zonas de produción en augas da competencia da Comunidade Autónoma.

O Intecmar foi designado laboratorio oficial de referencia da Comunidade Autónoma de Galicia para o control das biotoxinas mariñas, dando así cumprimento ao disposto no Regulamento (UE) N° 854/2004.

QUINTO.- A Consellería de Sanidade, a través da Dirección Xeral Saúde Pública, e o Intecmar, están interesados en coordinar e promover actuacións, que contribúan a mellorar a protección da poboación fronte aos riscos asociados ao consumo de moluscos bivalvos que incumpren as disposicións vixentes.

Por outra banda, cómpre ter en conta que a Lei 14/2013, do 26 de decembro, de racionalización do sector público autonómico, ten por obxecto a racionalización de todo o sector público autonómico e da actividade administrativa, así como a adopción de medidas dirixidas a unha maior eficiencia do gasto e a mellora da xestión do sector público autonómico. Baixo estas premisas determina que as relacións entre os órganos da Administración xeral da Comunidade Autónoma e as entidades instrumentais que integran o sector público autonómico respondan aos principios de cooperación, colaboración e asistencia recíprocas.

A tal fin, establece no artigo 8 o principio de autoprovisión de bens e de servizos dentro do propio sector público, segundo o cal a Administración xeral da Comunidade Autónoma e as entidades instrumentais do sector público realizarán as tarefas de interese público que lles corresponden cos medios dos que dispoña o sector público autonómico, debendo acudir, cando tales medios sexan insuficientes, á cooperación, colaboración e asistencia doutros órganos da Administración xeral da Comunidade Autónoma ou doutras entidades do sector público autonómico que si dispoñan dos medios dos que precisan.

O artigo 10 da citada Lei 14/2013, recolle entre os procedementos e instrumentos para materializar dito principio o establecemento de *“acordos de colaboración ou cooperación para o desempeño conxunto de tarefas comúns.”*

En virtude do exposto, as partes comparecentes acordan subscribir este acordo, que someten ás seguintes

CLÁUSULAS

PRIMEIRA.- Obxecto.

Constitúe o obxecto do presente instrumento, no marco da Rede de laboratorios constituída o 4 de febreiro de 2016, establecer unha liña específica de colaboración entre a Consellería de Sanidade e Intecmar, que posibilite a transmisión bidireccional da información relativa a biotoxinas, criterios microbiolóxicos (salmonella e vibrio),

norovirus, dioxinas e PCB's e metais pesados dos moluscos bivalvos procedentes das rías galegas e a realización de análises de biotoxinas para o control sanitario dos moluscos bivalvos procedentes de establecementos da Comunidade Autónoma de Galicia, facilitando o exercicio das competencias de control sanitario atribuídas á Consellería de Sanidade e á Consellería do Mar.

SEGUNDA.- Obrigas do Intecmar.

O Intecmar, como laboratorio oficial de referencia na noas Comunidade Autónoma e integrante de REDGALICIA, comprométese a:

- a) Transmitir información nos supostos e de conformidade co establecido no Anexo do presente acordo.
- b) Realizar as analíticas de toxinas lipofílicas polo método de referencia, de cromatografía líquida con detección de espectrometría de masas (LC-MS/MS), análises de toxicidade tipo PSP por bioensaio en rato segundo o método AOAC e análises de toxicidade de tipo ASP por cromatografía líquida de alta eficacia segundo o método da AOAC, que se mencionan no anexo do presente acordo.

TERCEIRA.- Obrigas da Consellería de Sanidade.

A Consellería de Sanidade comprométese a:

- a) Intercambiar información nos supostos e de conformidade co establecido no Anexo do presente acordo.
- b) Realizar, a través dos seus Servizos de Inspección de Saúde Pública, a toma de mostras e remitilas ao laboratorio do Intecmar.
- c) Colaborar no financiamento do custe da realización das analíticas convenidas, de conformidade co establecido na cláusula quinta do presente acordo.

CUARTA.- Coordinación e medios.

O desenvolvemento destas actividades realizarase polas unidades administrativas correspondentes, que serán coordinadas polas Direccións do Intecmar e de Saúde Pública, respectivamente.

O laboratorio do Intecmar destinará a infraestrutura, así como os recursos humanos e materiais necesarios para a realización e o cumprimento dos fins deste convenio.

QUINTA.- Financiamento.

A Conselleira de Sanidade comprométese a colaborar na cobertura dos gastos xerados pola realización de 200 analíticas, ata un máximo de *TRINTA MIL EUROS (30.000,00 €) anuais*, a razón de 150 €/análise, con cargo á aplicación 1102.413A.6402 dos orzamentos xerais da Comunidade Autónoma Galega para o ano 2016, na que existe crédito axeitado e suficiente. As sucesivas anualidades quedan condicionadas á existencia das necesarias dotacións presupostarias.

Dita cantidade unicamente cubre unha parte dos gastos xerados pola realización das analíticas, sendo a outra parte asumida polo Intecmar coa aplicación dos seus propios medios e recursos.

A dita cantidade pasarase o Intecmar por transferencia en cada exercicio, sen prexuízo de que antes do 30 de novembro o Intecmar deberá achegar unha relación das analíticas realizadas.

Para cumprir co obxecto do presente acordo, a Conselleria de Sanidade transferirá a a o Intecmar a cantidade de 90.000 € euros con cargo á aplicación orzamentaria 1102.413A.6402 dos orzamentos da Dirección Xeral de Saude Pública para os anos 2016, 2017 e 2018.

APLICACIÓN ORZAMENTARIA	ANO 2016	ANO 2017	ANO 2018	TOTAL
1102.413A.6402 Cod. Proxecto 201500441	30.000 €	30.000 €	30.000 €	90.000 €

A devandita transferencia instrumentarase a través dos correspondentes documentos contables que permitan as achegas entre organismos da Xunta de Galicia (Art. 64.1.g do Decreto Lexislativo 1/ 1999, do 7 de outubro, polo que se aproba o texto refundido da Lei de Réxime Financeiro e Orzamentario de Galicia).

SEXTA

O Intecmar , como órgano de coordinación, control e avaliación, poñerá a disposición da Consellería de Sanidade, todos os medios necesarios dos seus laboratorios para levar a cabo as tarefas que se derivan deste acordo.

SETIMA.- Comisión de seguimento.

Para o seguimento e avaliación do desenvolvemento do presente acordo, establécese unha comisión de planificación, seguimento, desenvolvemento e control.

Esta comisión constituirase no prazo dun mes dende a sinatura do acordo e estará formada polos titulares das Direccións do Intecmar e da Dirección Xeral de Saúde Pública e dúas persoas designadas por cada unha das direccións.

Reunirase como mínimo unha vez durante a vixencia do convenio e sempre que o solicite unha das partes, e os acordos adoptaranse por unanimidade.

Será competencia da devandita comisión:

- Incidir e impulsalo seguimento e desenvolvemento do acordo.
- Coñecer e aproba-los obxectivos e custos que se fixen para cada exercicio orzamentario e que formarán parte do anexo programático.
- Resolve-los problemas de interpretación que poidan xurdir na execución do convenio.

O seu funcionamento axustarase ao réxime de funcionamento dos órganos colexiados previsto na Lei 30/1992 de Réxime Xurídico das Administracións Públicas e do Procedemento Administrativo Común.

No suposto de desacordo entre as partes que compoñen esta comisión, o Conselleiro de Sanidade resolverá as distintas cuestións que foran obxecto de diverxencia.

OITAVA.- Natureza xurídica.

O presente acordo de cooperación constitúe o instrumento xurídico polo que se regula a actividade a desenvolver por cada unha das partes asinantes, consonte o artigo 14 da Lei 14/2013, do 26 de decembro, en relación cos artigos 8, e 9 da Lei 16/2010, de 17 de decembro, de Administración Xeral e do sector público autonómico de Galicia, así como lle será de aplicación os artigos 47 e seguintes da citada Lei 16/2010 e 4.1. n) en relación co 24.6 do Real decreto legislativo 3/2011, de 14 de novembro, cando a encomenda ou encargo teña por obxecto un negocio xurídico, en cuxa virtude se

encargue a unha entidade que teña atribuída a condición de medio propio e servizo técnico deste, a realización dunha determinada prestación.

En defecto de normas específicas, ás actividades realizadas baixo este acordo seralle de aplicación os principios inspiradores das citadas normas legais para resolver as dúbidas e lagoas que puideran producirse. E especificamente, no caso das discrepancias que se poidan producir no cumprimento e execución do presente acordo de colaboración resolveranse nos termos previstos no artigo 18.3 da Lei 14/2013, de 26 de decembro, en relación co artigo 13 da Lei 16/2010 do 17 de decembro.

NOVENA- Vixencia.

Este acordo producirá efectos desde o día seguinte ao da súa sinatura ata o 31 de decembro de 2018.

DECIMA.- Causas de resolución.

Será causa da resolución do presente convenio:

- O incumprimento total ou parcial dalgunha das súas cláusulas ou alteración esencial do seu contido sen o consentimento de ámbalas dúas partes.
- O mutuo acordo entre as partes.

En calquera caso, ambas partes comprométense a adoptar as medidas oportunas que garantan a finalización dos traballos que se tiveran iniciado.

En proba de conformidade, asínase este acordo, por triplicado exemplar, no lugar e data indicados anteriormente.

POLA CONSELLERÍA DE SANIDADE

POLO INTECMAR

Asdo.: Jesus Vazquez Almuiña

Asdo.: Rosa Mª Quintana Carballo

ANEXO PROGRAMÁTICO

1º.- Transmisión de información:

- a) **Biotoxinas:** O Intecmar remitirá á Dirección Xeral de Saúde Pública a información que se relaciona a continuación, vía fax ou por calquera outro medio de transmisión rápida que se acorde polas dúas partes:
- Informe diario de resultados analíticos de vixilancia de biotoxinas nas zonas de produción.
 - Resolucións actualizadas diariamente de aperturas e peches de zonas de produción.
 - Información puntual acerca de calquera modificación que se produza nas zonas de produción no que o control de biotoxinas se refire.
- b) **Control microbiolóxico:** Transmisión de información da calidade microbiolóxica das augas incluíndo o control de *Salmonella spp.*, indicando o plan establecido para o mesmo. Así mesmo, a Consellería de Sanidade comprométese a proporcionar información acerca de calquera problema puntual detectado no ámbito das súas competencias e a realizar as investigación e seguimentos que considere oportunos no referente a calquera problema producido por este tipo de microorganismos.
- c) **Norovirus:** O Intecmar remitirá á Dirección Xeral de Saúde Pública a información relativa aos resultados das mostraxes que para a determinación destes axentes se realicen no antedito laboratorio.
- d) **Dioxinas-PCBs:** Como consecuencia dos problemas xurdidos no contexto europeo, existindo un acordo de control de furanos/PCB's, a Consellería de Sanidade colaborará co Intecmar na obtención de información do contido destas substancias nos moluscos das rías galegas.
- e) **Metais pesados e hidrocarburos:** Ao abeiro do disposto na regulación europea que recolle este aspecto, o Intecmar e a Consellería de Sanidade colaborarán na obtención de información acerca do contido en metais pesados e hidrocarburos nos moluscos, por medio de analíticas a estes produtos que vai a realizar o Intecmar. Así mesmo, a Consellería de Sanidade remitirá a información que sobre este tema acade, logo dos controis realizados no mercado e nas industrias.

2º.- Análises:

O Intecmar comprométese á realización dun número aproximado de 200 análises combinada nunha mesma mostra, de toxinas lipofílicas polo método de referencia, de cromatografía líquida con detección de espectrometría de masas (LC-MS/MS), análises de toxicidade tipo PSP por bioensaio en rato segundo o método AOAC e análises de toxicidade de tipo ASP por cromatografía líquida de alta eficacia segundo o método da AOAC, de moluscos procedentes de diferentes establecementos desta Comunidade Autónoma, dentro do Control da Salubridade de Moluscos que a Dirección Xeral de Saúde Pública está levando a cabo.